

四庫全書

史部

欽定四庫全書

宋史卷四百五十四

元中書右丞相總裁托克托等修

列傳第二百十三

忠義九

趙時賞

趙希洎

劉子薦

黃文政

呂文信

鍾季玉

潘方

耿世安

丁黼

米立

楊壽孫

侯畱

王孝忠

高應松

張山翁

黃申

陳牽

蕭雷龍

宋應龍

褚一正

鄒鳳

劉子俊  
蕭燾夫

劉沐  
陳繼周

孫卓  
陳龍復

彭震龍  
張鎧

張雲

張汁  
杜許林琦

呂武  
蕭資

鞏信  
徐臻

蕭明哲  
金應

何時

陳子敬

劉士昭

王士敏  
趙孟桀

趙孟壘

趙時賞字宗白和州宗室也居太平州咸淳元年擢進

士第累官知宣州旌德縣德祐元年北軍至境時賞擁

民兵捍戰有功升直寶章閣軍器太監從二王入閩中

益王即位擢知邵武軍未幾言者以棄城論罷之文天祥開都督府于南劍奏辟叅議軍事江西招討副使與宗室孟滌提兵趣贛州取道石城復寧都縣數以偏師當一面戰比有勝時賞風神明俊議論慷慨有策謀尤為天祥所知及空沆之役兵敗走吳溪為追兵所執不屈死之時賞在軍中時見同列盛輜重飾姬侍歎曰軍行如春遊其能濟乎及被執見係壘它僚屬至者時賞輒麾去云小小簽廳官爾執此何為由是得脫者衆



趙希洎宗室子居宜春歷官至戶部尚書咸淳中迂丞相賈似道出領廣東轉運使德祐元年制置使黃萬石檄其勤王得潰卒數百道經廬陵卽守邀其軍遂與從子必向避地贛州亂定歸里時袁守聶嵩孫希洎內姍也勉之內款不能屈文天祥兵敗以失言與必向俱被囚辭節愈厲家人饋食則碎噐覆諸地俱不食據榻而死

劉子薦字貢伯吉州安福人父夢驥以進士歷官知澧

州沒於王事子薦以父任為湘鄉尉以獲盜功調撫州  
司錄有愬王應亨毆死荷擔黃九者獄成矣子薦閱受  
書疑而駁之俄烈風迅雷闢獄戶裂吏楔殺人者實孔  
目馮汝能非應亨也獄遂白得免死者八人事聞頒諭  
天下之為理官者改知贛縣監行在左藏庫通判常德  
府知融州陞辭度宗慰之曰廣郡凋瘵賴卿撫摩子薦  
對曰臣當推行德化以安其民至官以廉靜著聞主管  
仙都觀廣西經畧司檄為叅議官德祐二年十一月北

兵至靜江權經畧使馬堅遣子薦提狴兵藥弩手守城東門勢不支時瀛國公已入燕子薦取笏書其上云我頭可斷膝不可屈登城北望再拜取所衣袍瘞之語左右曰事急不可為吾有以死守或諷子薦遁去子薦曰死事義也何以遁為竟死之有黃文政者淮人戍蜀軍潰間道走靜江馬堅邀與同守城破文政被執大詬不屈大軍斷其舌以次剗之文政含胡叱咄比死不絕聲

呂文信文德之弟也仕至武功大夫沿江副司諮議官  
德祐初帥舟師次南康斛林夾白鹿磯與北兵遇戰死  
特贈定遠軍承宣使子師憲特與帶行閣職與兩子承  
信郎恩澤仍立廟賜額河湖若巡檢張興宗亦死之贈  
武翼郎賜緡錢三萬仍與一子承信郎恩澤

鍾季玉饒州樂平人淳祐七年舉進士調為都大坑冶  
屬改知萬載縣淮東制置使李庭芝薦之遷審計院改  
宗正寺簿又遷樞密院編修出知建昌軍會有旨江西

和糴季玉至郎才半年屬歲旱度其經賦不能辦請于朝和糴得減三之一還提舉常平未幾改轉運判官皆不赴後以江西轉運判官強起之郡大胥以賄敗前使百計護之季玉卒窮治投嶺表俄以祕書丞召還遭前使構讒而封駁之改都大提點坑冶北兵渡江季玉徙寓建陽兵至不屈死之有潘方者温州平陽人寶祐四年進士調監慶元府市舶慶元降附方不屈赴水死耿世安為武翼大夫淮東副總管兩淮都撥發官初謀

報大兵至制置使賈似道調世安提兵往漣水軍增戍  
衆方猶豫世安徑迎至漁溝以三百騎入陳鏖擊自午  
至酉身被七創猶能追殺潰兵收兵還至數里沒事聞  
贈五官立廟淮安賜額忠武

丁黼成都制置使也嘉熙三年北兵自新井入詐豎宋  
將李顯忠之旗直趨成都黼以為潰卒以旗榜招之既  
審知其非領兵夜出城南迎戰至石筍街兵散黼力戰  
死之方大兵未至黼先遣妻子南歸自誓死守至是從

黼者惟幕客楊大異及所信任數人大異死而復蘓黼  
帥蜀為政寬大蜀人思之事平賜額立廟

米立淮人三世為將從陳奕守黃州奕降立潰圍出江  
西制置使黃萬石署為帳前都統制大兵畧江西立迎  
戰于江坊被執不降繫獄行省遣萬石諭之曰吾官銜  
一箇牙牌寫不盡今亦降矣立曰侍郎國家大臣立一  
小卒爾何足道但三世食趙氏祿趙亡何以生為立乃  
生擒之人與投拜者不同萬石再三說之不屈遂遇害

趙文義者郢州都統制更戍歸與北兵遇力戰死之初  
開州之役文義兄武義亦死焉有楊壽孫者為雲安軍  
主簿兼教叅佐忠勝軍端平中北兵至中江縣與將官  
何庚安惟臣田廣澤及坤等連戰二日俱死之壽孫贈  
通直郎官一子下州文學庚等各贈承節一子進勇副  
尉

侯畠字道子溫州樂清人三貢於鄉兩試轉運司皆第  
一以武舉授合浦尉柳城令衛步軍司幹辦公事侍衛



馬軍行司計議官寶祐五年制置使賈似道辟通判海州兼河南府計議官李松壽據山東突出漣泗畱鑾城下死之闔室遇害太學生三十一人言於朝即海州賜廟旌忠謚曰節毅仍立廟其鄉畱所著有霜厓集

王孝忠為鎮江前軍統制兼淮東路分戍淮陰楊貴叛孝忠率衆迎戰勝氣百倍俄水軍統制朱信降賊孝忠孤軍力不敵死焉

高應松開慶元年進士繇衡州教授通判廣德軍召為

國子監丞權禮部員外郎翰林權直北兵自湧金門入  
舉朝奔竄從官留者九人應松其一也遷中書舍人直  
學士院尋遷權工部侍郎進端明殿學士簽書樞密院  
事從瀛國公至燕絕粒不語越七日卒張山翁字君達  
普州人景定三年進士德祐元年為荊湖宣撫司幹官  
鄂守張晏然議納款山翁以書譙讓之晏然既降山翁  
被執軍前諭曰若降不失作顯官山翁酬對不屈行省  
官賈思貞義之貸不殺後居黃鵠山聚徒教授而終有

南紀緇林藏雲山相鋤等集

黃申字酉鄉井研人開慶元年進士授德安尉攝主簿  
兼提點江西刑獄司簽廳獄事多所辯明丞相江萬里  
提刑黃震交薦之調安樂丞申為政廉謹有治聲以恩  
升從事郎大兵拔撫州下諸縣索降狀樂安令率其僚  
聯署以上申初聞變恚遣家人遠避至是獨抗不往令  
遣吏促之申不動吏白令令怒俄而吏民數百人集于  
庭彊與致之申顛踣于地若中風然衆捽蹴詬叱曰為

爾不順將累我輩申陽死為不聞令無如之何申有惠  
愛在民至暮衆舁入寘中堂翼日或食以粥得免遂去  
隱巴山中以終

陳奎字肇芳一字偉節饒州安仁人父詩川以武功補  
沭陽令咸淳元年父子同舉進士調滁州司戶叅軍父  
喪免改荆閬糧料院又以母憂去調朐山主簿制置使  
印應雷辟入幕德祐元年秋奎繇海道歸杭授南安軍  
教授不就還家奎少與謝枋得遊會枋得起兵安仁首

拔入幕執安仁令李景景牽里人也景請得以家貲二萬贖罪牽曰普天之下莫非王土家財獨非朝廷錢耶聲其罪斬之景子率鄉兵五千報怨牽度勢不敵引兵趨信州會守吏遁去牽聞於朝就攝郡事益王即位牽入覲遷宗正寺簿太府寺丞領江東安撫使出上饒接應郡縣所部才千餘人屯火燒山越數月戰潰被執至豫章元帥憐其才羈縻館留之遁去後三年復起兵尋敗入積煙山中自剄死所著有鶴心集其詩多譏刺當

時之士大夫弟年同時被執死焉

蕭雷龍字顯辰建昌新城人景定三年進士調臨安府學教授通判衢州及州守棄城遁朝命雷龍權知府事北兵薄城下不降脫去還建昌建昌已降雷龍與同里人黃巡檢起兵時大兵四合雷龍度不可支與黃巡檢及麾下數人奔入閩未出境為同安武人徐浚冲獲送縣權縣尹劉聖仲素與雷龍有怨殺之後聖仲北來泊舟小孤山有巨艦衝前建大旗書曰蕭知府兵繼見雷

龍坐船上聖仲大呼有頃不見以驚死

宋應龍者儒生通兵出入行陣三十餘年為諮議官寓  
泰州德祐二年六月甲寅大兵至泰州裨校孫貴胡惟  
孝尹端甫李遇春開門迎降應龍與其妻自縊於園中  
是時提刑諮議褚一正字粹翁廬州人武舉進士督戰  
高沙被創竟沒于水知興化縣胡拱辰縣破亦死之

鄒澠字鳳叔吉水人後徙永豐少慷慨有大志以豪俠  
鳴從文天祥勤王補武資至將軍益王立改寺丞領江

西招諭副使聚兵寧都得數萬改授江西安撫副使復  
興國永豐二縣進兵部侍郎兼江東西處置副使及永  
豐敗繼從天祥間關嶺道未幾復出開督府分司永豐  
興國境上北兵驟至大戰瀾脫身走至潮州及天祥被  
執瀾自殺當是時從天祥勤王死事者瀾與劉子俊等  
凡十有六人因次第其名附見左方

劉子俊字民章廬陵人嘗中漕試少與文天祥同里開  
相友善天祥開督府興國子俊詣府計事補宣教郎帶



行軍器監簿兼督府機直空坑兵敗子俊收兵保洞源  
接應郡縣尋入廣與大兵遇戰潰復招集散亡與鄒淵  
同趨潮州天祥兵敗子俊被執自詭為天祥意使大兵  
不窮追天祥可間走也未幾別隊執天祥至相遇於途  
各爭真贋至大將前始得其實乃烹子俊

劉沐字淵伯廬陵人文天祥鄰曲也少相狎暱天祥好  
奕與沐對奕窮思忘日夜以為常及起兵辟補宣教郎  
督府機宜暨天祥出使沐領兵還天祥歸開府南劍沐

收部曲來會改授太府寺簿專將一軍為督府親衛會  
空坑兵敗被執至豫章父子同日死焉仲子死亂兵季  
子復從天祥死嶺南當時江西忠義皆沐所號召沐性  
沈實而圖機晝夜應酬疊疊不倦云

孫臬字實甫吉州龍泉人獻簡公抃之後天祥長妹婿  
也天祥起兵檄臬招忠義士補宣教郎帶行監官告院  
知吉州龍泉縣天祥擁兵出贛里人奉臬復龍泉拒守  
不下尋為叛者所陷執至隆興殺之

彭震龍字雷可永新人天祥次妹婿也性跌蕩喜事嘗以罪墨天祥起兵補宣教郎帶行太社令知永新縣會天祥出使被執震龍遁歸吉州已失乃結峒獠起兵天祥兵出嶺震龍接應復永新大兵至震龍為親黨所執至帥府腰斬之屠永新

蕭燾夫永新人與兄敬夫俱天祥客燾夫為詩有豪俊氣天祥起兵補從仕郎及彭震龍謀復其縣燾夫贊之縣受屠兄弟俱死之

陳繼周字碩卿寧都人淳祐三年貢於鄉以捕盜功行未奏名授廉州司法南豐縣知錄淮東總領幹官藤州觀察推官知吉州永豐縣改知高安縣廣東經畧司準備差遣知衛陽縣辟淮東轉般倉江東提點刑獄幹辦公事未上會咸淳十年詔徵勤王文天祥方守贛州即日舉兵造繼周問計繼周慨然為具言閭里豪傑子弟與凡起兵之處其為方畧甚詳於是留繼周幕中晝夜調度授繼周江西安撫司準備差遣率贛士以從繼周

雖弱不勝衣而年德有以服人士視為父兄進止疾徐  
惟指呼無敢先後詔改繼周合入官帶行監文思院差  
充江淞制置司主管機宜所部夜襲大兵於南柵門殺  
傷相當質明猶戰渴赴水死

張汴字朝宗一字次山蜀人少客丞相吳潛兄弟門出  
入荆閬歷年明習韜畧潛兄弟既失廢斥者十餘年繼  
文天祥起兵辟為祕閣修撰領廣東提舉督府叅謀左  
右幕府知無不為空坑兵敗為亂兵所殺處置使鄒鳳

得其屍葬之

呂武太平州步卒也文天祥出使武應募從行偕脫鎮江之難沿淮東走海道賴武力為多天祥開府南劔武以武功補官遣之結約州縣起兵相應道阻復崎嶇數千里即天祥于汀梅挺身患難化賊為兵以環衛官將數千人出江西以遇士大夫無禮死於橫逆一軍揮涕而葬之武忠梗出天性不避彊禦而好面折人過多觸忌諱故及於禍云

鞏信安豐軍人爲荊湖都統沈勇有謀本隸蘓劉義部  
曲文天祥開督府劉義以信與王福張必勝詣天祥信  
官至團練使同督府都統制江西招討使初至都府天  
祥以義士千人付之信曰此輩徒累人爾乃招淮士數  
千自隨然常怏怏曰有將無兵其如彼何天祥自興國  
趨永豐大兵追其後信戰於方石嶺中數矢傷重不能  
戰自投厓石而死土人葬之顏色如生贈清遠軍承宣  
使立廟旌之

蕭明哲字元甫太和人性剛有膽氣明大節少舉進士  
天祥開府汀州辟充督幹架閣監軍師出嶺明哲以贛  
縣民義復萬安連結諸砦拒守兵敗被執不屈死於隆  
興臨刑大罵不絕口聞者壯之

杜澣字貴卿丞相範從子也少負氣遊俠德祐元有  
詔勤王澣時宰縣糾集民兵得四千人文天祥開閩平  
江往附焉時陳志道等贊天祥出使澣力爭不可志道  
逐之去已而天祥果見留志道竊藏逃歸天祥北行諸



客無敢從者。許獨慨然請行。特改兵部架閣從京口以計賂守夜劉千戶者。得官鐙脫。天祥偕走淮。旬繇海道以達永嘉。益王即位。授司農卿。廣東提舉招討副使。督府叅謀尋往溫台。招集兵財。福安陷。與天祥相失。遂趨行朝。蘓劉義疑許。自來欲殺之。陳宜中、張世傑不可。使人監護之。乃免。久之。奉命復入天祥幕。及空坑兵敗。又與跋涉。患難以出。天祥移屯潮州。許議趨海道。天祥不聽。使護海舟至官富場。許懼力單。徑趨厓山。兵潰被執。

以憂憤感疾卒

林琦閩人也德祐二年大兵既迫臨安琦於赭山結集忠義數千人捍禦海道以功補宣教郎督府主管機宜文字充檢院文天祥開府南劔琦佐其幕琦外文采內忠實數涉患難無怨懟辭及潮州移屯琦俱被執至惠州遁復執之北行赴水為吏所拔至建康以憂憤死

蕭資天祥幕下書史也天祥起兵資於患難中扶持甚至空坑兵敗以全督府印功升閭門路鈐轄資性和厚

臨機應變輯穆將士總攝細務任腹心之寄潮陽移屯與大兵遇死之

徐臻温州人父官河南德祐元年春臻往省以道阻會天祥勤王臻往依之以筆札典樞密小心精練天祥被執臻脫難復來願從天祥北行扶持患難備殫忠款至隆興病死

余應者性少剛知義為天祥職書司入京補承信郎官路分天祥奉使被執左右皆散應獨無畔志及脫走鎮

江至淮東以憂憤死焉

何時字了翁撫州樂安人天祥同年進士也調廬陵尉尋入江西轉運使幕府還臨江軍司理叅軍郡獄相傳舊斬一寇屍能行一里許衆神之壕為肉身臯陶時至取故牘閱此寇嘗掠殺數人曰如此可為神乎命鞭之湛於水人服其明改知興國縣天祥起兵辟署帥府機宜帶行監文思院天祥入衛時任留司分司吉州餽運平江天祥奏時知撫州吉州下時脫身歸鄉里益王立

天祥開府南劍時起兵趨興國接引以時帶行監江西  
提刑時聚兵復崇仁縣未幾大軍奄至兵敗削髮為僧  
竄迹嶺南賣卜自給變姓名自號堅白道人又有陳子  
敬者贛州人以貲雄鄉里嘗從天祥遊天祥開閩汀州  
子敬募集民兵屯阜口據下流及天祥攻贛子敬與合  
謀忠效甚著空坑兵敗復聚兵屯黃塘砦連結山砦不  
降大軍以重兵襲其砦砦潰子敬不知所終

劉士昭太和人嘗為鍼工與鄉人同謀復太和縣敗血

指書帛云生為宋民死為宋鬼赤心報國一死而已因  
以其帛自縊死其黨入獄多乞憐苟免有王士敏者獨  
慷慨不撓題其裾此生無復望生還一死都歸談笑間  
大地盡為腥血污好收吾骨首陽山臨刑歎曰恨吾病  
失聲不能大罵耳同時有趙孟壘者合州人登開慶元  
年第為金華尉臨安降與從子由鑑懷太皇太后帛書  
詣益王擢宗正寺簿監軍復明州戰敗見獲不屈磔死  
方大軍駐紹興福王與芮從子曰孟采謀舉兵事泄被

執至臨安范文虎詰其謀逆孟采詔曰賊臣負國厚恩  
共危社稷我帝室之胄欲一刷宗廟之恥乃更以為逆  
乎文虎怒驅出斬之過宗廟呼曰太祖太宗列聖之靈  
在天何以使孟采至此都人莫不隕淚既死雷電晝晦  
者久之

宋史卷四百五十四

欽定四庫全書

史部  
宋史卷四百五十五

詳校官編修<sub>臣</sub>曹錫齡

洗馬臣王坦修覆勘

覆校官編修<sub>臣</sub>沈清藻

校對官中書<sub>臣</sub>龔敬身

謄錄舉人<sub>臣</sub>龔秉震



欽定四庫全書

宋史卷四百五十五

元中書右丞相總裁托克托等修

列傳第二百十四

忠義十

陳東

歐陽澈

馬伸

呂祖儉

呂祖泰

楊宏中

華岳

鄧若水

僧真寶

莫謙之

徐道明

陳東字少陽鎮江丹陽人蚤有雋聲倣儻負氣不戚戚於貧賤蔡京王黼方用事人莫敢指言獨東無所隱諱所至宴集坐客懼為已累稍引去以貢入太學欽宗即位率其徒伏闕上書論今日之事蔡京壞亂於前梁師成陰謀於後李彥結怨於西北朱勔結怨於東南王黼童貫又結怨於遼金朔開邊隙宜誅六賊傳首四方以謝天下言極憤切明年春貫等挾徽宗東行東獨上書請追貫還正典刑別選忠信之人往侍左右金人逼京

師又請誅六賊時師成尚留禁中東發其前後姦謀乃  
謫死李邦彥議與金和李綱及种師道主戰邦彥因小  
失利罷綱而割三鎮東復率諸生伏宣德門下上書曰  
在廷之臣奮勇不顧以身任天下之重者李綱是也所  
謂社稷之臣也其庸繆不才忌疾賢能動為身謀不恤  
國計者李邦彥白時中張邦昌趙野王孝迪蔡懋李棣  
之徒是也所謂社稷之賊也陛下拔綱列卿之中不一  
二日為執政中外相慶知陛下之能任賢矣斥時中而

不用知陛下之能去邪矣李綱任而未專時中斥而未去復相邦彥又相邦昌自餘又皆擢用何陛下任賢猶未能勿貳去邪猶未能勿疑乎金人聞罷綱職事臣等驚疑莫知所以綱自起庶官獨任大事邦彥等疾如仇讐恐其成功因用兵小不利遂得乘間投隙歸罪於綱夫一勝一負兵家常勢豈可遽以此傾動任事之臣竊聞邦彥時中等盡勸陛下他幸京城騷動若非綱為陛下建立則乘輿播遷宗廟社稷已為丘墟生靈已遭魚

肉賴聰明不惑特從其請宜邦彥等讒嫉無所不至陛下若聽其言斥綱不用宗社存亡未可知也邦彥等執議割地蓋河北實朝廷根本無三關四鎮是棄河北朝廷能復都大梁則不知割大原中山河間以北之後邦彥等能使金人不復敗盟乎一進一退在綱為甚輕朝廷為甚重幸陛下即反前命復綱舊職以安中外之心付种師道以閫外之事陛下不信臣言請徧問諸國人必皆曰綱可用邦彥等可斥也用舍之際可不審諸軍

民從者數萬書聞傳旨慰諭者旁午衆莫肯去方昇登  
聞鼓槓壞之喧呼震地有中人出衆鬻而磔之於是亟  
詔網入復領行營遣撫諭乃稍引去金人既解去學官  
觀望時宰議屏伏闕之士先自東始京尹王時雍欲盡  
致諸生於獄人人惴恐朝廷用楊時為祭酒復東職遣  
聶山詣學撫諭然後定吳敏欲弭謗議奏補東官賜第  
除太學錄東又請誅蔡氏且力辭官以歸前後書五上  
既歸復預鄉薦高宗即位五日相李綱又五日召東至

未得對會綱去乃上書乞留綱而罷黃潛善汪伯彥不報請親征以還二聖治諸將不進兵之罪以作士氣車駕歸京師勿幸金陵又不報潛善輩方揭示綱幸金陵舊奏東言綱在中途不知事體宜以後說為正必速罷潛善輩會布衣歐陽澈亦上書言事潛善遽以語激怒高宗言不亟誅將復鼓衆伏闕書獨下潛善所府尹孟庾名東議事東請食而行手書區處家事字畫如平時已乃授其從者曰我死爾歸致此於吾親食已如廁吏

有難色東笑曰我陳東也畏死即不敢言已言肯逃死乎吏曰吾亦知公安敢相迫頃之東具冠帶出別同邸乃與澈同斬於市四明李猷贖其尸瘞之東初未識綱特以國故至為之死識與不識皆為流涕時年四十有二潛善既殺二人明日府尹白事獨詰其何以不先關白微示慍色以明非已意越三年高宗感悟追贈東澈承事郎東無子官有服親一人澈一子令州縣撫其家及駕過鎮江遣守臣祭東墓賜緡錢五百紹興四年並



加朝奉郎秘閣修撰官其後二人賜田十頃

歐陽澈字德明撫州崇仁人年少美鬚眉善談世事尚氣大言慷慨不少屈而憂國閔時出於天性靖康初應制條敝政陳安邊禦敵十策州未許發退而復采朝廷之闕失政令之乖違可以為保邦御俗之方去蠹國殘民之賊者十事復為書并上聞已而復論列十事言臣所進三書實為切要然而觸權臣者有之迂天聽者有之或結怨富貴之門或遺怒臺諫之官臣非不知而敢

抗言者願以身而安天下也所上書為三巨軸廐置卒  
辭不能舉州將為選力士荷之以行會金人大入要盟  
城下而去澈聞輒語人曰我能口伐金人強於百萬之  
師願殺身以安社稷有如上不見信請質子女於朝身  
使穹廬御親王以歸鄉人每笑其狂止之不可乃徒步  
走行在高宗即位南京伏闕上封事極詆用事大臣遂  
見殺見陳東傳死時年三十七許翰在政府罷朝問潛  
善處分何人曰斬陳東歐陽澈耳翰驚失色因究其書

何以不下政府曰獨下潛善故不得以相視遂力求罷  
為東澈著哀詞澈所著飄然集六卷會稽胡衍既刻之  
豐城范應鈴為立祠學中

馬伸字時中東平人紹聖四年進士不樂馳騫每調官  
未嘗擇便利為成都郫縣丞守委受成都租前受輸者  
率以食色玩好蠱誅而敗伸請絕宿弊民爭先輸至沿  
途假寐以達旦常平使者孫侯蚤行怪問之皆應曰今  
年馬縣丞受納不病我也俟薦于朝崇寧初范致虛攻

程頤為邪說下河南府盡逐學徒伸註西京法曹欲依  
頤門以學因張繹求見十反愈恭頤固辭之伸欲休官  
而來頤曰時論方異恐貽子累子能棄官則官不必棄  
也曰使伸得聞道死何憾況未必死乎頤歎其有志進  
之自是公暇雖風雨必日一造忌媚者飛語中傷之弗  
顧卒受中庸以歸靖康初孫傳以卓行薦召御史中丞  
秦檜迎辟之擢監察御史及汴京陷金人立張邦昌集  
百官環以兵脅之俾推戴衆唯唯伸獨奮曰吾職諫爭

忍坐視乎乃與御史吳給約秦檜共為議狀乞存趙氏  
復嗣君位會統制官吳革起義募兵圖復二帝伸預其  
謀邦昌既僭立賊臣多從臾之伸首具書請邦昌速迎  
奉元帥康王同院無肯連名者伸獨持以往而銀臺司  
視書不稱臣辭不受伸投袂叱之曰吾今日不愛一死  
正為此耳爾欲吾稱臣邪即繳申尚書省以示邦昌其  
書略曰相公服事累朝為宋輔臣比不幸迫於強敵使  
當偽號變出非常相公此時豈以義為可犯君為可忘

宗社神靈為可昧邪所以忍須臾死而詭聽之者其心若曰與其虛遜於人而實亡趙氏之宗孰若虛受於已而實存以歸之耳忠臣義士未即就死闔城民庶未即生變者亦以相公必能立趙孤也今金人北還相公義當憂懼自列于朝康王在外國統有屬獄訟謳歌人皆歸往宜即發使通問掃清宮室率羣臣共迎而立之相公易服退處省中庶事皆稟命太后其赦書施恩惠收人心等事日下拘收俟康王御極施行然後相公北面

引咎以明身為人臣昧於防患遭寇讐脅汙當時不能  
即死以待陛下今復何面目事君請歸死司寇為人臣  
失節之戒伏闕下俟命如此則明主必能察相公忠實  
存國義非苟生且棄過而錄功矣今乃謀不出此時日  
已多肆然尚當非據偃寐禁闥若固有之羣心狐疑道  
路混瀆謂相公方挾強金使人遊說康王姑令南遁為  
久假不歸之計上天難欺下民可畏相公若以愚言粗  
知覺悟及此改圖猶可轉禍為福於匪朝伊夕之間過

此以往則相公包藏已深至慮轉異外飾事端愒日待期而陰結寇讐合從為亂九廟在天萬無成理伸必不能輔相公為宋朝叛臣也請先伏死都市以明此心邦昌得書氣沮謀喪明日議迎哲宗后孟氏垂簾追還偽赦乃遣馮澥李回等迎康王時王及之等猶請籍龍德宮寶貨斥賣靈沼魚藕以資官用伸復慨然引義檄之曰古者人臣去國三年不反然後收其田里君之禮臣如此臣之報君宜如何今二聖遠狩猶未出境天下之



人方且北首欲追挽而還之君之府藏燕遊恣一朝而毀乎爾等逆節甚矣力爭乃止高宗即位伸拜章以城陷不能救主遷不能死請就竄削上知其有忠力於國擢殿中侍御史撫諭荆湖廣南以誅邦昌及其黨王時雍等所過州縣諏察吏之賢否與民利疚以次列上于朝伸自湖廣將入奏黃潛善汪伯彥不法凡十有七事草疏已具朝廷方召孫覲謝克家乃先奏覲克家趨操不正靖康間與王時雍王及之等七人結為死黨附

耿南仲倡為和議助成賊謀有不主和議者則欲執送金人覲受金人女樂草表媚之極其筆力乃負國之賊宜加遠竄不報仲又進疏曰陛下得黃潛善汪伯彥以為輔相委任不復疑然自入相以來處事未嘗愜當物情遂使女真日強盜賊日熾國本日蹙威權日削且三鎮未服汴都方危前日遽下還都之詔至今鑒輿未能順動其不謹詔命如此草茅對策不如式考官罰金可矣一日黜三舍人乃取沈晦孫覲黃括輩諸羣小以掌

誥命其黜陟不公如此吳給張閤以言事被逐邵成章緣上言遠竄其壅塞言路如此祖宗舊制諫官御史有闕御史中丞翰林學士具名以進三省不敢預厥有深旨近擬用臺諫多取親舊不過欲為已助其毀法自恣如此張慤宗澤許景衡公忠有才皆可任重潛善伯彥忌之沮抑至死其妨功害能如此或責以救焚拯溺之事則曰難言蓋謂陛下制之不得施設也或問陳東之死則曰不知蓋謂其事繇於陛下也其過則稱君善則

稱已如此呂源狂橫陛下逐去不數月由郡守升發運其彊狠自專如此御營使雖主兵權凡行在諸軍皆其所統潛善伯彥別置親兵一千人請給居處優於衆兵其務收軍情如此廣市私恩則多復祠官之闕同惡相濟則力庇王安中之罪撫其所為豈不辜陛下倚任之重哉陛下隱忍不肯斥逐塗炭遺民固已絕望二聖還期在何時邪臣每念此不如無生歲月如流時幾易失望速罷潛善伯彥政柄別選賢者共圖大事疏入留中

明日改衛尉少卿伸以論事不行辭不拜錄其疏申御史臺且疊上章言臣言可采即乞施行若臣言非是合坐誣罔之罪移疾待命旬日詔伸言事不實送吏部責濮州監酒稅時用事者恚甚必欲殺之以濮迫寇境故有是命趣使上道伸怡然襆被而行死道中或曰王淵在濮潛善密嗾其不利於伸天下識與不識皆冤痛之明年金人陷廣陵伸言始驗潛善伯彥始以誤國竄殛於是臺臣奏伸嘗論潛善等罪乃復以衛尉少卿名實

未知其存亡也尋加直龍圖閣紹興初胡安國上時政  
論有曰仲言潛善伯彥措置乖方條其罪狀凡舉一事  
必立一證皆衆所共知共見不敢以無為有以是為非  
而當時曾不從用反以為言事不實而重責之是罰沮  
忠讜邪說何由而息公道何由而明乎仲既遠貶雖有  
詔命邈無來期君子閔焉賁以龍圖猶未盡褒勸之典  
乞重加追獎及其子孫以承天意詔贈諫議大夫仲天  
資純確學問有原委勇於為義而所韞深厚恥以自名

建炎初右正言鄧肅嘗論朝士臣邦昌者例貶二秩伸  
不辨也凡有建明輒削其藁人罕知之居官晨興必整  
衣端坐讀中庸一遍然後出涖事每日吾志在行道以  
富貴為心則為富貴所累以妻子為念則為妻子所奪  
道不可行也故在廣陵行篋一檐圖書半之山東已擾  
家尚留于鄆常稱孔子言志士不忘溝壑勇士不忘喪  
其元今日何日溝壑乃吾死所也有何兌者昭武人受  
學於伸伸沒兌嘗輯其事狀紹興中為辰州通判都郵

報秦檜自陳其存趙之功謂它人莫預兄徑取所輯事  
狀達尚書省檜大怒下兄荆南詔獄獄辭皆出吏手兄  
坐削官竄真陽檜死始放還復其官尋卒

呂祖儉字子約祖謙之弟也受業祖謙如諸生監明州  
倉將上會祖謙卒部法半年不上者為違年祖儉必欲  
終期喪朝廷從之詔違年者以一年為限自祖儉始終  
更赴銓丞相周必大語尚書尤袤招之祖儉已調衢州  
法曹而後往見潘時經畧廣東欲辟為屬祖儉辭尋以



侍從鄭僑張杓羅點諸葛庭瑞薦名除籍田令中丞何澹所生父繼室周氏死澹欲服伯母服下太常百官雜議祖儉貽書宰相曰禮曰為伋也妻者是為白也母今周氏非中丞父之妻乎將不謂之母而謂之何中丞為風憲首而以不孝令百僚何觀焉除司農簿已而乞補外通判台州寧宗即位除太府丞時韓侂冑寢用事正言李沐論右相趙汝愚罷之祖儉奏汝愚亦不得無過然未至如言者所云侂冑怒曰呂寺丞乃預我事邪會

祭酒李祥博士楊簡皆上書訟汝愚沐皆劾罷之祖儉  
乃上封事曰陛下初正清明登用忠良然曾未踰時朱  
熹老儒也有所論列則亟使之去彭龜年舊學也有所  
論列亦亟許之去至於李祥老成篤實非有偏比蓋衆  
聽所共孚者今又終於斥逐臣恐自是天下有當言之  
事必將相視以為戒鉗口結舌之風一成而未易反是  
豈國家之利邪又曰今之能言之士其所難非在於得  
罪君父而在忤意權勢姑以臣所知者言之難莫難於

論災異然言之而不諱者以其事不關於權勢也若乃御筆之降廟堂不敢重違臺諫不敢深論給舍不敢固執蓋以其事關貴倖深慮乘間激發而重得罪也故凡勸導人主事從中出者蓋欲假人主之聲勢以漸竊威權耳比者聞之道路左右謖御於黜陟廢置之際間得聞者車馬輻湊其門如市恃權怙寵搖撼外庭臣恐事勢浸淫政歸倖門不在公室凡所薦進皆其所私凡所傾陷皆其所惡豈但側目憚畏莫敢指言而阿比順從

內外表裏之患必將形見臣因李祥獲罪而深及此者是豈矯激自取罪戾哉實以士氣頽靡之中稍忤權臣則去不旋踵私憂過計深慮陛下之勢孤而相與維持宗社者寢寡也疏既上東擔待罪有旨呂祖儉朋比罔上安置韶州中書舍人鄧驛繳奏祖儉罪不至貶御筆祖儉意在無君罪當誅竄逐已為寬恩會樓鑰進讀呂公著元祐初所上十事因進曰如公著社稷臣猶將十世宥之前日大府寺丞呂祖儉以言事得罪者其孫也

今投之嶺外萬一即死聖朝有殺言者之名臣竊為陛下惜之上問祖儉所言何事然後知前日之行不出上意侂冑謂人曰復有救祖儉者當處以新州矣衆莫敢出口有謂侂冑曰自趙丞相去天下已切齒今又投祖儉瘴鄉不幸或死則怨益重曷若少徙內地侂冑亦悟祖儉至廬陵將趨嶺得旨改送吉州遇赦量移高安二年卒詔令歸葬祖儉之謫也朱熹與書曰熹以官則高於子約以上之顧遇恩禮則深於子約然坐視羣小之

為不能一言以報効乃令子約獨舒憤懣觸羣小而蹈  
禍機其愧歎深矣祖儉報書曰在朝行聞時事如在水  
火中不可一朝居使處鄉閭理亂不知又何以多言為  
哉在謫所讀書窮理賣藥以自給每出必草屨徒步為  
踰嶺之備嘗言因世變有所推折失其素履者固不足  
言矣因世變而意氣有所加者亦私心也所為文有大  
愚集祖儉從弟祖泰

祖泰字泰然夷簡五世孫寓常之宜興性疏達尚氣誼

學問該洽徧遊江淮交當世知名士得錢或分挈以去  
無吝色飲酒至數斗不醉論世事無所忌諱聞者或掩  
耳而走慶元初祖儉以言事安置韶州既移瑞州祖泰  
徒步往省之留月餘語其友王深厚曰自吾兄之貶諸  
人箝口我雖無位義必以言報國當少須之今未敢以  
累吾兄也及祖儉沒貶所嘉泰元年周必大降少保致  
仕祖泰憤之乃詣登聞鼓院上書論侂冑有無君之心  
請誅之以防禍亂其略曰道學自古所恃以為國也丞

相汝愚今之有大勲勞者也立偽學之禁逐汝愚之黨是將空陛下之國而陛下不知悟邪陳自强侂冑童孺之師躡致宰輔陛下舊學之臣若彭龜年等今安在邪蘇師旦平江之吏胥以潜郎而得節鉞周均韓氏之厮役以皇后親屬得大官不識陛下在潜郎時果識師旦乎椒房之親果有均乎凡侂冑之徒自尊大而卑朝廷一至於此也願亟誅侂冑及師旦而罷逐自强之徒獨周必大可用宜以代之不然事將不測書出中外大駭



有旨呂祖泰挾私上書語言狂妄拘管連州右諫議大夫程松與祖泰狎友懼曰人知我素與遊其謂預聞乎乃獨奏言祖泰有當誅之罪且其上書必有教之者今縱不殺猶當杖黥竄遠方殿中侍御史陳讜亦以為言乃杖之百配欽州牢城收管初監察御史林采言偽習之成造端自必大故有少保之命祖泰知必死冀以身悟朝廷無懼色既至府廷尹為好語誘之曰誰教汝共為章汝試言之吾且寬汝祖泰笑曰公何問之愚也吾

固知必死而可受教於人且與人議之乎尹曰汝病風  
喪心邪祖泰曰以吾觀之若今之附韓氏得美官者乃  
病風喪心耳祖泰既貶道出潭州錢文子為醴陵令私  
贖其行僂胄使人迹其所在祖泰乃匿襄郢間僂胄誅  
朝廷訪得祖泰所在詔雪其冤特補土州文學改授廸  
功郎監南嶽廟喪母無以葬至都謀於諸公得寒疾索  
紙書曰吾與吾兄共攻權臣今權臣誅吾死不憾獨吾  
生還無以報國且未能葬吾母為可憾耳乃卒尹王柟

為具棺斂歸葬焉

楊宏中字充甫福州人弱冠補國子生孝宗崩光宗以疾不能執喪時趙汝愚知樞密院奏請太皇太后迎立寧宗于嘉邸以成喪禮朝野晏然遂命汝愚為右丞相登進耆德及一時知名之士有意慶歷元祐之治韓侂胄竊弄國柄引將作監李沐為右正言首論罷汝愚中丞何澹御史胡紘章繼上竄汝愚永州國子祭酒李祥博士楊簡連疏掄爭俱被斥宏中曰師儒能辨大臣之

冤而諸生不能留師儒之去於誼安乎衆莫應獨林仲  
麟徐範張衡蔣傳周端朝五人願預其議遂上書曰自  
古國家禍亂之由初非一道惟小人中傷君子其禍尤  
慘君子登庸杜絕邪枉要其處心實在於愛君憂國小  
人得志仇視正人必欲空其朋類然後可以肆行而無  
忌於是人主孤立而社稷危矣黨錮敝漢朋黨亂唐大  
率由此元祐以來邪正交攻卒成靖康之變臣子所不  
忍言而陛下所不忍聞也臣竊見近者諫臣李沐論前

宰相趙汝愚數談夢兆擅權植黨將不利於陛下以此  
加誣實不其然汝愚乞去中外咨憤而言者以為父老  
懼呼蒙蔽天聽一至於此章頴力辨其非首遭斥逐聞  
者已駭既而祭酒李祥博士楊簡相繼抗論毅然求去  
告假幾月善類皇皇一旦有外補之命言者惡其扶植  
正論極力觝排同日報罷六館之士為之憤惋涕泣今  
李沐自知邪正之不兩立而公議之不直已也乃欲盡  
去正人以便其私於是託朋黨以罔陛下之聽臣謂二

人之去若未足惜殆恐君子小人消長之機於此一判則靖康已然之監豈堪復見於今日邪陛下厲精圖政方將正三綱以維人心采羣議以定國是遽聽奸回槩疑善類此臣等之所未諭也臣願陛下鑒漢唐之禍懲靖康之變精加宸慮特奮睿斷念汝愚之忠勤察祥簡之非黨灼李沐之回邪明示好惡旌別淑慝竄李沐以謝天下還祥簡以收士心臣雖身膏鼎鑊實所不辭書奏不報則繳副封于臺諫侍從侂冑大怒坐以不合上

書之罪六人皆編置以宏中為首將竄之嶺南中書舍人鄧驛上書救之不聽右丞相余端禮拜於榻前至數十丐免遠徙上惻然許之乃送太平州編管天下號為六君子明年移福州聽讀嘉泰三年寧宗幸學特旨放還開禧元年宏中登進士第教授南劍州太守余礫故相端禮子與之相得甚懽侂冑誅先以言得罪者悉加褒錄嘉定元年特遷宏中一秩亦不拜六年以礫與汪達趙彥橚薦授戶部架閣俄遷太學正八年夏早上封

事指切無隱遷武學博士改宣教郎時諫官應武論一  
學官宏中季試策士及其故武聞而銜之秋戊祀武成  
王祭酒行事故事博士攝亞獻至是不命宏中宏中白  
于祭酒於是武劾宏中與同列競且謂其激矯不自愛  
遂通判潭州以親老請祠差知武岡軍未受卒年五十  
三端朝字子靜嘉定三年試禮部第一終刑部侍郎兼  
侍講衛字用叟以父任補官有二子與端朝同登進士  
第仲麟字景仲溥字象夫久居學校忠鯁有聞咸以不



偶死範自有傳

華岳字子西為武學生輕財好俠韓侂冑當國岳上書  
曰旬月以來都城士民彷徨四顧若將喪其室家諸軍  
妻子隱哭含悲若將驅之水火闔閭籍籍欲語復噤駭  
於傳聞莫曉所謂臣徐考之則侍衛之兵日月潛發樞  
機之遞星火交馳戎作之役倍於平時郵傳之程兼於  
疇昔乃知陛下將有事於北征也侂冑以后族之親位  
居極品專執權柄公取賄賂畜養無籍吏僕委以腹心

賣名器私爵賞睥睨神器窺覘宗社日益炎炎不敢嚮  
邇此外患之居吾腹心者也朝臣有以庸瑣之資請媼  
師旦驟入政府者有以諛佞之資附阿佞胄致身顯貴  
者陳自強老不知恥貪不知止私植黨與陰結門第凡  
見諸行事惟知佞胄不知君父此外患之居吾股肱者  
也爽爽汝翼諸李之貪懦無謀倪倬杲諸郭之膏粱  
無用諸吳之恃寵專僭諸彭之庸孱不肖皇甫斌魏文  
諒毛致通秦世輔之彫瘵軍心瘡痍士氣以致陳孝慶

夏興祖商榮田俊邁之徒皆以一卒之才各得把麾專制平日剗膏刻血色苴佻胄以致通顯饑寒之士咸願食其肉而不可得萬一陛下付以大事彼之首領自不可保奚暇為陛下計哉此外患之居吾爪牙者也程松之納妾求知或以售妹入府或以獻妻入閣魯館之貢子為郎富宮之庸駑充位此外患之居吾耳目者也蘇師旦以穢吏冒節鉞牙儉名爵周筠以隸卒冒戎鈐市易將相此外患之扼吾咽喉者也彼之所謂外患者實

未足憂而此之外患蓋已周吾一身之間矣禮樂征伐自天子出所貴乎中國者皆聽命於陛下也今也與奪之命黜陟之權又不出於陛下而出於仇冑是吾有二中國也命又不出於仇冑而出於蘇師旦周筠是吾有三中國也女真以區區之地猶能逼我淮漢曾謂外患之居吾腹心股肱耳目爪牙及吾咽喉而不馮陵吾之宗廟社稷乎曾謂一家之中自為秦越一舟之中自為敵國而能制遠人乎比年軍皆倍克而士卒自仇其將

佐民皆侵漁而百姓自畔其守令家自為戰此又啓吾中國億萬之仇敵也今不務去吾腹心股肱爪牙耳目咽喉與夫億萬之仇敵而欲空國之師竭國之財而與遠人相從於血刃相塗之地顧不外用其心歟臣嘗推演兵書自去歲二元甲子五福太一初度吳分四神直符對臨荆楚始擊蜚符旁臨甌粵青門直使交次于幽冀黑殺黃道正按于燕趙考之成法主算最長客算最短兵以先發為客後發為主自太歲乙丑至庚午六年

之間皆不利於先舉儻其畔盟犯義撓我疆場至於事  
不獲已然後應之則反主為客猶曰庶幾萬一國家首  
事倡謀則將帥內睽士卒外畔肝腦萬民血刃千里此  
天數之不利於先舉也矧將帥庸愚軍民怨懟馬政不  
講騎士不熟豪傑不出英雄不收餽糧不豐刑便不固  
山砦不脩堡壘不設吾雖帶甲百萬饋餉千里而師出  
無功不戰自敗此人事之不利於先主也臣願陛下除  
吾一身之外患吾中國之外患既已除然後公道開明

正人登用法令自行紀綱自正豪傑自歸英雄自附侵  
疆自還中原自復天下自底於和平四海自躋於仁壽  
何俟乎兵革哉不然則亂臣賊子毀冕裂冠哦九錫隆  
恩之詩恃貴不可侔之相私妾內姬陰臣將相魚肉軍  
士塗炭生靈墜百世之遠圖虧十廟之遺業陛下此時  
雖欲不與之偕亡則禍迫於身權出於人俛首待終何  
臍可噬事之未然難以取信臣願以身屬之廷尉待其  
軍行用師勞還奏凱則梟臣之首風遞四方以為天下

欺軍罔上者之戒儻或干戈相尋敗亡相繼強敵外攻  
姦臣內畔與臣所言盡相符契然後令臣歸老田里永  
為不齒之民書奏侂冑大怒下大理賤建寧園土中郡  
守傅伯成憐之命獄卒使出入毋繫伯成去又迂守李  
大異復寘獄侂冑誅放還復入學登第為殿前司官屬  
鬱不得志謀去丞相史彌遠事覺下臨安獄獄具坐議  
大臣當死寧宗知岳名欲生之彌遠曰是欲殺臣者竟  
杖死東市



鄧若水字平仲隆州井研人博通經史為文章有氣骨  
吳曦叛州縣莫敢抗若水方為布衣憤甚將殺縣令起  
兵討之夜封雞盟其僕曰我明日謁知縣汝密懷刃以  
從我顧汝即殺之僕佯許諾至期三顧不發歸責其僕  
以背盟僕曰平人尚不可殺況知縣乎此何等事而使  
我為之若水乃仗劍徒步如武興欲手刃曦中道聞曦  
死乃還人皆笑其狂而壯其志登嘉定十三年進士第  
時史彌遠柄國久若水對策極論其姦請罷之更命賢

相否則必為宗社憂考官寘之末甲策語播行都士爭誦之彌遠怒諭府尹使逆旅主人譏其出入將寘之罪或為之解乃已理宗即位應詔上封事曰行大義然後可以弭大謗收大權然後可以固大位除大姦然後可以息大難寧宗皇帝晏駕濟王當繼大位者也廢黜不聞於先帝過失不聞於天下史彌遠不利濟王之立夜矯先帝之命棄逐濟王并殺皇孫而奉迎陛下曾未半年濟王竟不幸於湖州揆以春秋之法非弑乎非篡乎

非攘奪乎當悖逆之初天下皆歸罪彌遠而不敢歸過於陛下者何也天下皆知倉卒之間非陛下所得知亦諒陛下必無是心也亦料陛下必能掃清妖氛以雪先帝濟王父子終天之憤今踰年矣而乾剛不決威斷不行無以大慰天下之望昔之信陛下之必無者今或疑其有昔之信陛下不知者今或疑其知陛下何以忍清明天日而以此身受此汙辱也盍亦求明是心於天下而俾有辭於千古乎為陛下之計莫若遵泰伯之至德

伯夷之清名季子之高節而後陛下之本心明于天下  
此臣所謂行大義以弭大謗策之上也自古人君之失  
大權鮮有不自廢立之際而盡失之當其廢立之間威  
動天下既立則眇視人主是故強臣挾恩以陵上小人  
怙強以無上久則內外相為一體為上者喑默以聽其  
所為日朘月削殆有人臣之所不忍言者威權一去人  
主雖欲固其位保其身有不可得宣繒薛極彌遠之肺  
腑也王愈其耳目也盛章李知孝其鷹犬也馮櫛其爪

牙也彌遠之欲行某事害某人則此數人者相與謀之  
曷嘗有陛下之意行乎其間哉臣以為不除此數凶陞  
下非惟不足以弭謗亦未可以必安其位然則陛下何  
憚久而不為哉此臣所以謂收大權以定大位策之次  
也次而不行又有一焉曰除大姦然後可以弭大難李  
全一流民耳寓食於我兵非加多土地非加廣勢力非  
特盛也賈涉為帥庸人耳全不敢妄動何也名正而言  
順也自陛下即位乃敢倔彊何也彼有辭以用其衆也

其意必曰濟王先皇帝之子也而彌遠放弑之皇孫先  
皇帝之孫也而彌遠戕害之其辭直其勢壯是以沿淮  
數十萬之師而不敢睥睨其鋒雖曰今暫無事未也安  
知其不一日羽檄飛馳以濟王為辭以討君側之惡為  
名彌遠之徒死有餘罪不可復惜宗社生靈何辜焉陛  
下今日而誅彌遠之徒則全無辭以用其衆矣上而不  
得則思其次次而不得則思其下悲夫制置司不敢為  
附驛卻還之以格當改官奏上彌遠取筆橫抹之而罷

嘉熙間召為太學博士當對草奏數千言略曰寧宗不  
豫彌遠急欲成其詐此其心豈復顧先帝之生我先帝  
不得正其終陛下不得正其始臣請發冢斲棺取其屍  
斬之以謝在天之靈往年臣嘗上封事請禪位近屬以  
洗不義之污無路自達今其書尚在謹昧死以聞將對  
前一日假筆吏於所親潘允恭允恭素知若水好危言  
諭筆吏使竊錄之允恭見之懼并及禍走告丞相喬行  
簡亦大駭翼日蚤朝奏出若水通判寧國府退朝名閤

門舍人問曰今日有輪對官乎舍人以若水對行簡曰  
已得旨補外矣可格班若水袖其書待廡下舍人諭使  
去若水怏怏而退自知不為時所容到官數月以言罷  
遂不復仕隱太湖之洞庭山賈似道在京湖聞其名辟  
參軍事若水雅思其鄉乃起從其招因西歸蜀居山中  
有盜夜劫之若水危坐不動盜擊其首流血被面亦不  
動乃舍去若水為學務躬行恥為空言削木為主大書  
曰自古以來忠臣孝子義夫節婦之位歲時祀之有一



子膂力絕人築山砦以兵捍衛鄉井砦破舉家遇害

僧真寶代州人為五臺山僧正學佛能外死生靖康之  
擾與其徒習武事於山中欽宗召對便殿眷賚隆渥真  
寶還山益聚兵助討州不守敵衆大至晝夜拒之力不  
敵寺舍盡焚酋下令生致真寶至則抗詞無撓酋異之  
不忍殺也使郡守劉駒誘勸百方終不顧且曰吾法中  
有口回之罪吾既許宋皇帝以死豈當妄言也怡然受  
戮北人間見者嘆異焉

莫謙之常州宜興僧人也德祐元年糾合義士捍禦鄉閭詔為溧陽尉是冬沒于戰陳贈武功大夫時萬安僧亦起兵舉旗曰降魔又曰時危聊作將事定復為僧旋亦敗死

徐道明常州天慶觀道士也為管轄賜紫德祐元年北兵圍城道明謁郡守姚訔請曰事急矣君侯計將安出訔曰內無食外無援死守而已道明亟還慨然告其徒曰姚公誓與城俱亡吾屬亦不失為義士廼取觀之文

籍置石函藏坎中兵屠城道明危坐炷香讀老子書兵使之拜不顧誦聲琅然以刃脅之不為動遂死焉

宋史卷四百五十五

宋史卷四百五十五考證

陳東傳高宗感悟追贈東澈承事郎○

臣蒲封

按揮塵

錄葉夢得進對聖訓言陳東歐陽澈可贈一官并與子或弟一人恩澤始罪東等出于倉卒終是以言責人朕甚悔之今方降詔使士庶皆得言事當使中外皆知此意東等皆贈官及子弟恩澤優恤其家

宋史卷四百五十五 考證

欽定四庫全書

宋史卷四百五十六

元中書右丞相總裁托克托等修

列傳第二百十五

孝義

李璘

甄婆兒

徐承珪

劉孝忠

呂昇

王翰

羅居通

黃德興

齊得一

李罕澄

邢神留

沈正

許祚

李琳等

胡仲堯

仲容陳兢

洪文撫

易延慶

董道明

郭琮

畢贊

顧忻

李瓊

朱泰

成象

陳思道

方綱

龐天祐

劉斌

樊景溫

榮恕旻

祁暉

何保之

李玘

侯義

王光濟

李祚等

江白

裘承詢

孫濟等

常真

子晏玉金等

杜誼

姚宗明

鄧中和

毛安輿

李訪

朱壽昌

侯可

申積中

郝戴

支漸

鄧宗古

沈宣

蘇慶文

臺仰忻

趙伯深



彭瑜

毛洵

李籌  
楊芾

楊慶

陳宗

郭義

申世寧

苟與齡

王珠

顏詡

張伯威

蔡定

鄭綺

鮑宗  
嚴附

冠冕百行莫大於孝範防百為莫大於義先王興孝以教民厚民用不薄興義以教民睦民用不爭率天下而由孝義非履信思順之世乎太祖太宗以來子有復父仇而殺人者壯而釋之刳股割肝咸見慶賞至於數世同居輒復其家一百餘年孝義所感醴泉甘露芝草異

木之瑞史不絕書宋之教化有足觀者矣作孝義傳

李璘瀛州河間人晉開運末契丹犯邊有陳友者乘亂殺璘父及家屬三人乾德初璘隸殿前散祗候友為軍小校相遇於京師寶積坊北璘手刃殺友而不遁去自言復父讎案鞫得實太祖壯而釋之雍熙中又有京兆鄠縣民甄婆兒母劉與同里人董知政忿競知政擊殺劉氏婆兒始十歲妹方襁褓託隣人張氏乳養婆兒避仇徙居赦村後數年稍長大念母為知政所殺又念其

妹寄張氏與兄課兒同詣張氏求見妹張氏拒之不得見婆兒憤怒悲泣謂兄曰我母為人所殺妹流寄他姓大讎不報何用生為時方寒食具酒餞詣母墳慟哭歸取條桑斧置袖中往見知政知政方與小兒戲婆兒出其後以斧所其腦殺之有司以其事上請太宗嘉其能復母讎特貸焉

徐承珪萊州掖人幼失父母與兄弟三人及其族三十口同甘藜藿衣服相讓歷四十年不改其操所居崇善

鄉緝俗里木連理瓜瓠異蔓同賓州以聞乾德元年詔  
改鄉名義感里名和順承珪嘗為贊皇令

劉孝忠并州太原人母病經三年孝忠割股肉斷左乳  
以食母母病心痛劇孝忠然火掌中代母受痛母尋愈  
後數歲母死孝忠傭為富家奴得錢以葬富家知其孝  
行養為已子後養父兩目失明孝忠為舐之經七日復  
能視以親故事佛謹嘗於像前割雙股肉注油創中然  
燈一晝夜劉鈞聞而召見給以衣服錢帛銀鞍勒馬署

宣陵副使開寶二年太祖親征太原召見慰諭

呂昇萊州人父權失明剖腹探肝以救父疾父復能視而昇不死冀州南宮人王翰母喪明翰自抉右目睛補之母目明如故淳化中並下詔賜粟帛

羅居通益州成都人母死廬墓三年有甘露降墳樹芝草生其旁開寶四年長史以聞詔以居通為延長主簿大中祥符初資州人黃德輿葬父母負土成墳甘泉湧其側降詔旌表

齊得一密州諸城人幼嗜學及長能讀五經善於教授鄉里士大夫子弟不遠百里皆就之肄業焉晉末皇甫暉為密州防禦使得一父為客將及暉叛歸淮南屢率衆剽劫於故郡民之牛羊犬豕悉取以犒士卒得一之家被掠殆盡後王萬敢為防禦使性貪暴執鄉民十八家責其嘗以牛酒餽賊盡殺之而取其資產得一親屬死者十餘人唯得一與兄脫身獲免明年詣闕上訴朝廷遣使按鞫之得實萬敢削官判官胡輒生死得一乃

歸鄉里布衣蔬食不樂仕進開寶中詔郡國舉廉退孝悌之士本郡即以得一應詔至闕策試中選授章丘主簿

李罕澄冀州阜城人也七世同居漢乾祐三年詔改鄉里名及旌其門閭太平興國六年長史以漢所賜詔書來上復旌表之

邢神留深州陸澤人父超逋官租里胥督租與超鬪超毆里胥死神留年十六詣吏求代父死州以聞特詔減

死賜里胥家萬錢為棺斂具端拱初泰州海陵人沈正  
父為屯田院衙官凶暴無賴使酒毆平人死正中塗見  
父恐惴述其故正即號呼褫衣就毆其屍巡警者捕送  
官獄具怡然就聞者悲之

許祚江州德化人八世同居長幼七百八十一口太平  
興國七年旌其門閭淳化二年本州言祚家春夏常乏  
食詔歲貸米千斛又有信州李琳十五世同居貝州田  
祚京兆惠從順十世同居廬州趙廣順安軍鄭彥圭信



州俞雋八世同居陝州張文裕六世同居襄州張巨源  
劉芳潭州瞿景鴻溫州陳侶江陵褚彥逢五世同居徐  
州彭程四世同居皆賜詔旌表門閭巨源素習法律太  
平興國五年賜明法及第芳淳化四年來賀壽寧節賜  
進士出身侶事母至孝賜其母粟帛彥逢兄弟五人皆  
年七十餘至道元年轉運使表其事詔補彥逢教練使  
胡仲堯洪州奉新人累世聚居至數百口構學舍于華  
林山別墅聚書萬卷大設廚廩以延四方游學之士南

唐李煜時嘗授寺丞雍熙二年詔旌其門閭仲堯詣闕  
謝恩賜白金器二百兩淳化中州境旱歉仲堯發廩減  
市直以賑饑民又以私財造南津橋太宗嘉之除本州  
助教許每歲以香稻時果貢于內東門五年遣弟仲容  
來賀壽寧節名見仲容特授試校書郎賜袍笏犀帶又  
以御書賜之公卿多賦詩稱美仲堯稍遷國子監主簿  
致仕卒仲容字咸和咸平三年復至闕貢土物改大理  
評事屢被賜賚仲容建本縣孔子廟頗為宏敞後遷光

祿丞致仕天禧中特賜緋魚卒年七十九以弟之子用  
訥為後試校書郎仲容弟克順端拱二年進士至都官  
貲外郎三司戶部判官仲容子用之洎從子用莊用舟  
並進士及第

陳兢江州德安人陳宜都王叔明之後叔明五世孫兼  
唐右補闕兼生京祕書少監集賢院學士無子以從子  
褒為嗣褒至鹽官令褒生灌高安丞灌孫伯宣避難泉  
州與馬總善注司馬遷史記行於世後遊廬山因居德

安嘗以著作佐郎名不起大順初卒伯宣子崇為江州  
長史益置田園為家法戒子孫擇羣從掌其事建書堂  
教誨之僖宗時嘗詔旌其門南唐又為立義門免其徭  
役崇子哀江州司戶哀子昉試奉禮部昉家十三世同  
居長幼七百口不畜僕妾上下姻睦人無間言每食必  
羣坐廣堂未成人者別為一席有犬百餘亦置一槽共  
食一犬不至羣犬亦皆不食建書樓於別墅延四方之  
士肄業者多依焉鄉里率化爭訟稀少開寶初平江南

知州張齊上請仍舊免其徭役從之昉弟之子鴻太平  
興國七年江南轉運使張齊賢又奏免雜科兢即鴻之  
弟淳化元年知州康戩又上言兢家常苦食不足詔本  
州每歲貸粟二千石後兢死其從父弟旭每歲止受貸  
粟之半云省嗇而食可以及秋成屬歲儉穀貴或勸其  
全受而糶之可邀善價旭曰朝廷以旭家羣從千口軫  
其乏食貸以公粟豈可見利忘義為罔上之事乎至道  
初遣內侍裴愈就賜御書還言旭家孝友儉讓近於淳

古太宗嘗對近臣言之參知政事張洎對曰旭宗族千餘口世守家法孝謹不衰閨門之內肅於公府且言及旭受貸事上以遠民義聚復能固廉節為之嘆息大中祥符四年以旭為江州助教旭卒弟蘊主家事天聖元年又以蘊繼為助教蘊卒弟泰主之泰弟度太子中舍致仕從子延賞可並舉進士延賞職方員外郎

洪文撫南康建昌人本姓犯宣祖偏諱改焉曾祖諤唐虔州司倉參軍子孫眾多以孝悌著稱六世義居室無

異爨就所居雷湖北創書舍招來學者至道中本軍以  
聞遣內侍裴愈齎御書百軸賜其家文撫遣弟文舉詣  
闕貢土物為謝太宗飛白一軸曰義居人以賜之命文  
舉為江州助教三年八月又詔表其門閭自是每歲遣  
子弟入貢必厚賜荅之文撫兄子待用登咸平二年進  
士第至都官員外郎

易延慶字餘慶筠州上高人父贊以勇力仕南唐至雄  
州刺史延慶幼聰慧涉獵經史尤長聲律以父蔭為奉

禮郎顯德四年周師克淮南賀歸朝授道州刺史延慶  
亦授大名府兵曹參軍後為大理評事知臨淮縣乾德  
末賀卒葬臨淮延慶居喪摧毀廬於墓側手植松柏數  
百本旦出守墓夕歸侍母紫芝生於墓之西北數年又  
生玉芝十八莖本州將表其事延慶懇辭或畫其芝來  
京師朝士多為詩賦稱其孝感服闋延慶以母老稱疾  
不就官母卒從藁殯數年延慶出為大理寺丞嘗司建  
安市征及母葬有期私歸營葬掩壙而返知軍扈繼昇



言其擅去職坐免所居官復廬墓側數年母平生嗜栗  
延慶樹二栗樹墓側二樹連理蘇易簡朱台符為贊美  
之後知端州卒子綸大中祥符元年進士及第

董道明蔡州褒信人母死出窆道明潛匿墓中人瘞之  
經三日家人發冢取之道明無恙終身廬於墓側

郭琮台州黃巖人幼喪父事母極恭順娶妻有子移居  
母室凡母之所欲必親奉之居常不過中食絕飲酒茹  
葷者三十年以祈母壽母年百歲耳目不衰飲食不減

鄉里異之至道三年詔書存恤孝悌鄉老陳贊率同里四十人狀琮事于轉運使以聞有詔旌表門閭除其徭役明年母無疾而終琮哀號幾乎滅性鄉閭率金帛以助葬又有越州應天寺僧者幼貧無以養母剝髮乞食以給晨夕母年一百五歲而終潭州長沙人畢贊仕郡為引贊吏性至孝父母皆年八十餘轉運使表其事詔贊解職終養

顧忻泰州泰興人十歲喪父以母病葷辛不入口者十

載鷄初鳴具冠帶率妻子詣母之室問其所欲如此五十年未嘗離母左右母老目不能覩物忻日夜號泣祈天刺血寫佛經數卷母目忽明燭下能縫衽九十餘無疾而終又有杭州仁和人李瓊以鬻繒為業事母孝夜常十餘起省母母喜食時新瓊百方求市得必十倍酬其直

朱泰湖州武康人家貧鬻薪養母常遠數十里外易甘旨以奉母泰服食麤糲戒妻子常候母色一日鷄初鳴

入山及明憇于山足遇虎搏攫負之而去泰已瞑眩行  
百餘步忽稍醒厲聲曰虎為暴食我所恨母無託爾虎  
忽棄泰於地走不顧如人疾驅狀泰匍匐而歸母扶持  
以泣泰亦彊舉動不踰月如故鄉里聞其孝感率金帛  
遺之里人目為朱虎殘

成象渠州流江人以詩書訓授里中事父母以孝聞母  
病割股肉食之詔賜束帛醪酒淳化中李順盜據郡縣  
象父母驚悸而死燼骨寄浮圖舍象號泣營葬賊平鄉

里率錢三百萬贈之象廬於墓側以衰服襟袂飾土於墳上日三斗每慟聞者戚愴未嘗食肉衣帛或贈之亦不受虎豹環廬而卧象無畏色鸞百餘集廬中禾生墓側吐九穗服終猶未還家知禮者為書以諭之遂歸教授遠近目為成孝子

陳思道江陰人喪父事母兄以孝悌聞鬻醢市側以給晨夕買物不酬價如所索與之母病思道衣不解帶者數月雙目瘡爛飲食隨母多少洎母喪水漿不入口七

日既葬哀嚮醢之利得錢十萬奉其兄結廬墓側日夜悲慟其妻時携兒女詣之拒不與見夏日種瓜以待過客書則白兔馴狎夜則虎豹環其廬而卧咸平元年知軍上其事詔賜束帛旌其門

方綱池州青陽人八世同爨家屬七百口居室六百區每日鳴鼓會食嘗出稻五千筭賑貸貧民景德二年轉運使馮亮以聞詔旌其門天禧中侍御史韓億安撫江南使還言綱家稅籍錢四百餘千米二千五百斛同居

四百年而本縣科率一無寬假望蠲其戶雜科詔從之  
龐天祐江陵人以經籍教授里中父疾天祐割股肉食  
之疾愈又復病目喪明天祐號泣祈天舐之父年八十  
餘大中祥符四年卒天祐負土封墳結廬其側晝夜號  
不絕聲知府陳堯咨親往致奠上其事詔旌表門閭天  
祐家無儋石儲居委巷中堯咨為徙里門之右築闕表  
之

劉斌定州人父加友端拱中為從弟志元所殺斌兄弟

皆幼隨母改適人母嘗戒之曰爾等長必復父仇景德  
中斌兄弟挾刀伺志元於道刺之不殊即詣吏自陳州  
具獄上請詔志元黥面配隸汝州釋斌等罪

樊景溫陝州芮城人榮恕旻雄州歸信人兄弟異居積  
年大中祥符中景溫樗樹五枝并為一恕旻家榆樹兩  
本自合兩家感其異復義聚鄉人稱雍睦

祁暉字坦之萊州膠水人淳化三年進士歷度支員外  
郎直集賢院天禧中出知維州母卒葬于州城之南暉



既解官就墳側構小室號泣守護蔬食經六冬墮足二指有白烏白兔馴擾墳側州人異之以狀聞有詔旌美賜帛三十匹粟三十石令長吏每月存問

何保之梓州通泉人業進士有至行母卒負土成墳廬於其側日有羣鳥飛集墳上哀鳴不去又嘗有兔馴於坐隅人稱異焉大中祥符降詔旌恤

李玘大名宗城人性篤孝力耕以事母母卒讓田與其弟堅遂廬於墓所晝夜號泣負土築墳高丈餘又以二

代及諸族父母藁葬者盡禮築之凡三年成六墳皆丈  
餘不食肉衣帛不預人事皇皇然唯恐築之不及墳成  
復留守墳三年常令兄之子賣藥以自給年六十餘足  
未嘗入縣門鄉人目為李孝子天禧中知府張知白以  
狀聞詔賜粟帛令府縣安存之里中有母在而析產者  
聞玘被旌兄弟慚懼復相率同居

侯義應天府楚丘人貧無產傭田以事母里人有葬其  
親而遽返者義母過其冢泣謂義曰我死其若是乎義

乃感激自誓而不欲言但慰其母曰勿悲義必不爾咸  
平中母卒義力自辦葬不掩墳壙晝則負土築墳夜則  
慟哭柩側妻子困匱不給田主曹氏哀憐之資以餼糧  
踰年墳間瓜異蒂木連理又有巨蛇遶其側不暴物野  
鴿飛而不去嘗遇盜劫其衣服既而知是義物悉還之  
王光濟廬州人喪母因刻像日夕奉事如平生孝道純  
篤咸平二年本州以孝聞有詔旌之時又有徐州豐人  
李祚親喪廬墓側凡二十七年家人百計勉諭不聽益

州雙流人周善敏喪父廬於墓側母病又割股肉以啖之遂愈大中祥符九年特詔旌表祚賜善敏粟帛存慰之

江白建昌人景德二年進士父禹錫有節義高年不仕躬自教授大中祥符初獻東封詩十五篇有詔嘉美賜以粟帛歲時遣使存問五年卒白自鄞尉罷還負土營葬廬於墓側藜羹芒屨晝夜號泣將終制猶然轉運使以其狀聞詔賜帛二十匹粟麥二十石醪酒十缸

裘承詢越州會稽人居雲門山前十九世無異爨子弟  
習弦誦鄉里稱其敦睦州以聞詔旌其門閭咸平後又  
有保定軍孫浦襄州常元紹蔡州王美解州董孝章並  
十世同居莫州高珪永定軍朱仁貴潞州邢濬相州趙  
祚八世同居麟州楊榮隰州趙友開封李居正潁州張  
可象衛州張珪滄州崔諒七世同居邢州王覺趙州曹  
遵六世同居兗州童升陳州樊可行京兆元守全平定  
軍段德五世同居開封張仁遇亳州王子上建昌軍瞿

肅四世同居肅家百五十口長幼孝悌鄉人化之又河陰王世及大名李宗祐陳州劉閏宣州汪政潭州李耕或聚居至七百口累數十百年並所在請加旌表詔從之仍蠲其課調大中祥符初東封泰山判兗州王欽若言曲阜東野宜乾封竇益合居五六世有節行四年祀汾陰考制度使馬起言陝州張化基閣用和楊忠義聚族累世孝悌可稱並即行在所降詔褒美各優賜粟帛常真陳州項城人父母死廬墓終喪負土成墳不茹葷

血周廣順中詔旌其門閭開寶七年本州以聞詔再加旌表真妻病子晏割股肉以養母及死次子守規徒跣日一食廬墓三年太平興國八年詔旌表之又有齊州王詮河南李繼成滄州胡元興並母死負土成墳晝夜哭不絕聲州郡繼以聞皆降詔旌其門閭賜以粟帛

杜誼字漢臣台州黃巖人事父母至孝父剛嚴誼獨失愛惴惴不自容伺顏色而後進繼喪父母號慟晝夜不絕勺水不入口者累日卜葬徒跣負土為墳往來十餘

里日渡塘澗泥水沒胫雖大雨雪未嘗少止手足皸裂  
血流以漆塗之每覆一畚必三遠墮號而後去既葬遂  
芟舍墓旁負土終喪人往視之輒遣去日一飯不輟雖  
虎狼交於墓側誼泰然無所畏明年吳越大水山皆發  
洛推巨石走十數里台州山最高而水又夜至旁山之  
民居廬墓田畜牧漂壞者甚衆而獨不及誼邑人狀其  
事以聞詔書嘉獎事族父衍甚謹衍愛之均諸子以祖  
垂象廕入官至贊善大夫嘗知永城縣歲捐俸錢三十



萬以收瘞汴渠之溺死者凡四十餘又出俸錢率其下  
新文宣王廟兩旁為學舍數十區旦夕講學於其堂永  
城父老稱誼之政為不可及誼生平敦厚尚信義有大  
志家貧不恤有無常推以濟親友後通判梓州卒子揆  
纔十六歲哭誼墓旁卒

姚宗明河中永樂人也其十世祖栖雲當唐貞元中調  
卒戍邊栖雲之父語其兄曰兄嗣未立可無往某幸有  
子請代兄行遂戰沒塞上時栖雲方三歲其母再嫁栖

雲養於伯母既長事伯母如其母伯母亡栖雲葬之又  
招魂葬其父痛其父死於邊乃廬於墓次終身哀慕不  
衰縣令蘇轍以俸錢買地開阡刻石表之河中尹渾瑊  
上其事詔加優賜表其門名其鄉曰孝悌社曰節義里  
曰敬愛栖雲生岳岳生君儒君儒生師正自岳至師正  
四世廬墓五世孫曰厚六世曰雅七世曰文八世曰敬  
真九世曰直十世曰宗明當慶歷初有司以姚氏十世  
同居聞于朝仁宗詔復其家十一世孫用和十二世孫

士明十三世孫德自宗明至德又三世自慶歷以後又五十餘年而其家孝睦不替姚氏世為農無為學者家不甚富有田數十頃聚族百餘人子孫躬事農桑僅給衣食歷三百餘年無異辭者經唐末五代兵戈亂離而子孫保守墳墓骨肉不相離散求之天下未或有焉

鄧中和字祖德開封長垣人舉三禮景祐慶歷間喪親廬墓終其喪定省往來如事生者二十年負土累墳高三丈

毛安輿嘉州洪雅人年九歲父死負土為墳廬於其側  
三年知益州張方平聞之遺以酒餼狀其事以聞

李訪韶州人業進士廬父母墓有虎暴傷旁人而不近  
訪又有白鳥集墓上

朱壽昌字康叔揚州天長人以父異蔭守將作監主簿  
累調州縣通判陝州荆南權知岳州州濱重湖多水盜  
壽昌籍民船刻著名氏使相伺察出入必以告盜發驗  
船所向窮討之盜為少弭旁郡取以為法富弼韓琦為

相遣使四出寬恤民力擇壽昌使湖南或言邵州可置  
冶采金者有詔興作壽昌言州近蠻金冶若大發蠻必  
爭自此邊境恐多事且廢良田數百頃非敦本抑末之  
道也詔亟罷之知閬州大姓雍子良屢殺人挾財與勢  
得不死至是又殺人而賂其里民出就吏獄具壽昌覺  
其姦引囚詰之曰吾聞子良與汝錢十萬許納汝女為  
婦且婚汝子故汝代其命有之乎囚色動則又撻之曰  
汝且死書券抑汝女為婢指錢為顧直又不婚汝子將

柰何囚悟泣涕覆面曰囚幾悞死以實對立取子良正  
諸法郡稱為神蜀人至今傳之知廣德軍壽昌母劉氏  
巽妾也巽守京兆劉氏方娠而出壽昌生數歲始歸父  
家母子不相聞五十年行四方求之不置飲食罕御酒  
肉言輒流涕用浮屠法灼背燒頂刺血書佛經力所可  
致無不為者熙寧初與家人辭訣棄官入秦曰不見母  
吾不反矣遂得之於同州劉時年七十餘矣嫁党氏有  
數子悉迎以歸京兆錢明逸以其事聞詔還就官由是

以孝聞天下自王安石蘇頌蘇軾以下士大夫爭為詩  
美之壽昌以養母故求通判河中府數歲母卒壽昌居  
喪幾喪明既葬有白鳥集墓上拊同母弟妹益篤又知  
鄂州提舉崇禧觀累官司農少卿易朝議大夫遷中散  
大夫卒年七十壽昌勇於義周人之急無所愛嫁兄弟  
兩孤女葬其不能葬者十餘喪天性如此

侯可字無可華州華陰人少倜儻不羈以氣節自許既  
壯盡易前好篤志為學隨計入京里中醵金贖行北還

悉散其餘與同舉者曰此金鄉里所以資應詔者也不  
可以為他利且行聞鄉人病念曰吾歸則彼死矣遂留  
不去病者瘡輟已馬載之徒步而歸孫沔征儂獍請參  
軍事奏功得官知巴州化城縣巴俗尚鬼而廢醫唯巫  
言是用娶婦必責財貧人女至老不得嫁可為約束立  
制度違者有罪幾變其習再調華原主簿富人有不占  
田籍而質人田券至萬畝歲責其租可晨馳至富家發  
積出券歸其主郡吏趙至誠貪狡凶橫持守以下短長



前後莫能去可暴其罪荷校寘獄言於大府誅之聞者  
快服簽書儀州判官西夏寇邊使者使可按視即以數  
十騎涉夏境猝與之遇亟分其騎為三四令之曰建爾  
旗幟旋山徐行夏人循環間見疑以為誘騎不敢擊韓  
琦鎮長安薦知涇陽縣說渭源羗酋輸地八千頃因城  
熟羊以撫之琦上其功又議復鄭白渠得名對旋以微  
罪罷官至殿中丞卒于家年七十二可輕財樂義急人  
之急憂人之憂與田頌為友頌病重千里求醫未歸而

顏死目不瞑人曰其待侯君乎且歛而可至拊之乃瞑  
顏無子不克葬可辛勤百營嚮衣相役卒葬之方天寒  
單衣以居有饋白金者顧顏之妹處室舉以佐其匱具  
一日自遠歸家以窶告適友人郭行扣門曰吾父病醫  
邀錢百千賣吾廬而不售可惻然計橐中裝畧當其數  
盡與之關中稱其賢

申積中成都人襁褓中楊繪從其父起求之為子及長  
知非楊氏而絕口不言年十九登進士第事所養父母

盡孝終身有二弟一妹為畢婚娶始歸本族復為申氏  
蜀人以純孝歸之政和六年以奉議郎通判德順軍翰  
林學士許光凝嘗守成都得其事薦諸朝名赴京師擢  
提舉永興軍學事道卒光凝復與宣和殿學士薛嗣昌  
中書舍人宇文黃中表其操行詔予一子官初光凝所  
同薦者三人其一河陽故大理丞陳芳一門十四世同  
居三百年一鄧州王襄經術登科年未六十請老事孀  
嫂如母養孤甥如子教誨後進賙恤鄉里貧民以學行

稱乞加獎異詔表芳門閭賜襄號處士

郝戴字伯牙石州定胡人家貧竭力營養或憐傷之貸以錢數百萬使取息自贍戴重謝留錢五六年不用復返之舉進士調宛丘尉舞陽主簿通山令時年未五十以父樵老不第上書請致仕為父求官執政諭使赴官而後請曰如是則可升朝籍遇恩及親矣於是留妻子於家獨奉父行踰歲竟謝事上官以其治縣有績惜其去固留之耆老拜庭遮道皆不能止得太子中允以歸

未至鄉里而樵卒自畚土造冢人有助之者使實土冢  
上去則隨撒之服除州以狀聞詔賜粟帛治平末以翰林  
學士呂公著薦起為奉寧軍推官涇原經畧使亦奏  
辟幕府戴曰向所以未老致仕欲官及親也既不能及  
尚庶幾以恩得贈今則無及矣姻族語其妻聶氏使勸  
戴仕曰吾不德無以助君子矧敢強其所不欲以累其  
高哉聶事舅姑亦以孝義著戴忠信自將篤行苦節不  
仕而卒司馬光為銘其墓

支漸資州資陽人年七十持母喪既葬廬墓側負土成墳蓬首垢面三時號泣哀毀瘠甚白蛇狸兔擾其旁白雉白鳥日集于櫟木五色雀至萬餘回翔悲鳴若助哀者鄉人旬文鼎自娶婦即與父母離居覩漸至行深自悔責號慟而歸孝養盡志鄉閭觀感而化者甚衆

鄧宗古簡州陽安人父死自培土為墳廬其側晨夕號慟甘露降于墓木里中號為鄧孝子

沈宣汝州梁人母亡既葬不塞墓門三十有六月晝負

土夜拊棺而卧為墳廣百尺妻高氏亦有孝行漸以下  
三人元豐中皆褒賜粟帛

蘇慶文臺亨皆夏縣人慶文事父母以孝聞母少寡慶  
文懼其妻不能敬事每戒之曰汝事吾母少不謹必逐  
汝妻奉教母得安其室終身

亨工畫元豐中朝廷脩景靈宮調天下畫工詣京師選  
試其優者待詔翰林畀以官祿亨名第一以父老固辭  
歸養閭里賢之

仰忻字天貺溫州永嘉人力學以篤行稱年五十餘執  
母喪盡孝禮躬自負土廬于墓側有慈烏白竹之瑞紹  
聖中郡守楊蟠表其里孝廉坊大觀二年以行取士郡  
以忻應詔未幾卒特贈將仕郎

趙伯深字逢原父子偁宣和間為棣州兵官屬會兵動  
燕雲子偁被檄往塞上伯深時尚幼與其母張留居棣  
州既而金人渡河伯深母子相失子偁亦隔絕建炎二  
年始得南歸子偁卒伯深訪尋其母三十餘年一旦聞



在瀘南伯深徒步入蜀間關累年紹興二十一年乃得其母相持號泣哀感行路曾慥在夔州賦詩以美其孝彭瑜字君玉吉之安福人熙寧間失其母瑜朝夕焚香祈天願知母所在如是十餘年俄有人言母為泰和倪氏婦瑜竟迎以歸

毛洵字子仁吉州吉水人天聖二年進士又中拔萃科性至孝凡守四官再以親疾解任執藥調膳嘗而後進三月不之寢室父應佺通判太平州卒官母高繼卒于

池陽舟次持鍾荷土以為墳手胝面黔親友不能識廬於墓凡二十一月朝夕哭踊食裁脫粟諸生請問經義對之流涕未嘗言文抱疾歸數日而卒郡以孝聞賜其家帛五十匹米五十斛兄溥字文祖亦以哀毀卒於舟中李籌者洵同縣人字彥良與弟衡字平國生同乳二歲喪母十歲喪父兄弟每以不逮事親為恨政和中改葬其母於楊山負土成墳廬于墓左未幾廬所產木一本兩榦高丈許復合于一至其末乃分兩榦五枝鄉人

以為瑞有楊芾者亦同縣人字文卿性至孝歸必市酒肉以奉二親未嘗及妻子紹興五年大饑為親負米百里外遇盜奪之不與盜欲兵之芾慟哭曰吾為親負米不食三日矣幸哀我盜義而釋之

楊慶鄞人父病貧不能名醫廼剗股肉啖之良已其後母病不能食慶取右乳焚之以灰和藥進焉入口遂差久之乳復生宣和三年守樓異名其坊曰崇孝紹興七年守仇愬為之請十二年詔表其門復之愬曰韓退之

作鄆人對以毀傷支體為害義而匹夫單人身膏草莽  
執訓之理未宏汲引之徒多闕而乃行成于內情發自  
天使稍知詩書禮義之說推其所存出身事主臨難伏  
節死義豈減介之推安金藏哉

陳宗永嘉人年十六母蔡病篤刲股為餌病愈已而復  
病不救宗一慟而絕郡守陸德輿云陳宗自毀其體哀  
慟傷生雖非孝道之正而能為人所難為之事亦天性  
之至官為合葬榜曰陳孝子墓

郭義興化軍人早遊太學以操尚稱年四十餘客錢塘  
聞母喪徒跣奔喪每一慟輒嘔血家貧甚故人有所饋  
不受聚土為墳手蒔松竹而廬于其旁甘露降于墓上  
烏鵲馴集郡上其事詔旌表其閭於所居前安綽楔左  
右建土臺高一丈二尺方正下廣上狹飾白間以赤仍  
植所宜木

申世寧信州鉛山人紹興六年潘達兵襲鉛山父俞年  
七十未及出戶遇賊賊意其有藏金欲殺之世寧年未

冠亟引頸願代父死賊感其孝兩全之

苟與齡字壽隆滁州來安人志尚高潔事其親生養死  
葬力竭而禮盡鄉黨稱之母歿廬墓側有芝十九莖生  
于墓亭郡縣以事聞旌其門

王珠字仲淵吉州龍泉人以孝謹聞建炎間居父憂芝  
數本生墓側倒植竹以為杙復生柯葉紹興間再罹母  
喪復有雙竹靈芝之祥

顏詡唐太師真卿之後真卿嘗謫廬陵故詡為吉州永

新人詔少孤兄弟數人事繼母以孝聞一門千指家法  
嚴肅男女異序少長輯睦匹俎無主厨饌不異義居數  
十年終日怡愉家人不見其喜愠年七十餘卒

張伯威大安軍人武翼大夫御前前軍正將祥之子紹  
熙元年武舉進士調神泉尉大母黃年九十八不忍之  
官黃得血痢疾瀕殆伯威剔左臂肉食之遂愈繼母楊  
因姑病篤驚而成疾伯威復剔臂肉作粥以進其疾亦  
愈伯威妹嫁崔均其姑王疾妹亦剔左臂肉作粥以進

達旦即愈知大安軍羅植即伯威所居立純孝坊崔均所居立孝婦坊事聞詔伯威與升擢倍賜其妹束帛

蔡定字元應越州會稽人家世微且貧父革依郡獄吏傭書以生資定使學遊鄉校稍稍有稱郡獄吏一日坐舞文法被繫革以註誤年七十餘矣法當免繫鞫胥任澤削其籍年而入之罪且與獄吏等案具府奏上之方待命于朝故俱久囚而革不得獨決定切痛念父當者年以非辜墮圖狴誓將身贖數詣府號愴請代坐獄弗



許請效命于戎行弗許請隸五符為兵又弗許定知父終不可贖也仰而呼曰天乎將使定坐視父纏徽縲乎父老耄不應連繫傭書罪不應與獄吏等理明矣而無所云愬父老而刑定之生其何益乎定圖死矣庶有司哀憐而釋父則雖死無憾矣於是預為志銘其墓又為狀若詣府者結置袂間皆叙陳致死之由冀其父之必免也以建炎元年十二月甲申自赴河死府帥聞之驚曰真孝立命出革厚為定具棺歛事而撫周其家

鄭綺婺州浦江人善讀書通春秋穀梁學以肅睦治家  
九世不異爨四世孫德珪德璋孝友天至晝則聯几案  
夜則同衾寢德璋素剛直與物多迕宋亡仇家遂陷以  
死罪當會逮揚州德珪哀弟之見誣乃陽謂曰彼欲害  
吾也何預爾事我往則姦狀白爾去得不死乎即治行  
德璋追至諸暨道中兄弟相持頓足哭爭欲就死德珪  
默計沮其行遂給以無往夜將半從閭道逸去德璋復  
追至廣陵德珪已斃於獄德璋聞之慟絕者數四負骨

歸葬廬墓再期每一悲號烏鳥皆翔集不食德珪之子  
文嗣幼病僂德璋鞠之如已子有鮑宗巖者字傅叔徽  
州歙人子壽孫字子壽宋末盜起里中宗巖避地山谷  
間為賊所得縛宗巖樹上將殺之壽孫拜前願代父死  
宗巖曰吾才矣僅一子奉先祀豈可殺之吾願自死盜  
兩釋之

宋史卷四百五十六